

官常典

官常典第五百十六卷

將帥部名臣列傳七十四

金一 鶻謀瑟

按金史本傳鶻謀瑟朮吉水斜卯部人也性忠直寬厚重節義勇於戰父阿鶻土贈金吾衛上將軍穆宗時鶻謀瑟內附先遣子寧吉從間道送款遂使活里曠與鶻謀瑟合軍攻降諸部因領其衆與弟胡麻谷渾坦姪阿里等攻下諸城從撒改破塢塔城穆宗屢賞之破高麗戍兵與石適歡討平諸部蒲察部雅里孛董與其兄弟胡八雙括等欲叛歸遼鶻謀瑟執之送於康宗賜資甚厚破高麗曷懶甸及下陲魯城有功天輔六年卒年七十二天眷中贈銀青光祿大夫

迪姑迭

按金史本傳迪姑迭溫迪罕部人祖扎古迺父阿胡迭世爲胡論水部長迪姑迭年二十餘代領父謀克攻寧江州敗遼援兵獲甲馬財物攻破奚營回至韓州遇敵二千人擊走之斡魯古與遼人戰於咸州兵已却迪姑迭以本部兵力戰諸軍復振遂大破之護步答岡之役乙里補孛董陷敵中迪

姑迭援出之攻黃龍府身被數創授猛安天輔七年從上至山西卒

李師夔

按金史本傳師夔字賢佐奉聖永興人少倜儻有大志以廢入仕爲本州勸監天輔六年太祖襲遼主於鴛鴦灤郡守委城遁去衆無所屬相與叩門請師夔主郡事師夔許之乃搜卒治兵迪古乃兵至奉聖州師夔與其故人沈璋密謀出降曰一城之命懸於此舉璋曰君言是矣如軍民不從奈何師夔卽率親信十數輩詰旦出城見余睹與之約曰今已服從願無以兵入城及俘掠境內余睹許諾詔以師夔領節度以璋佐之賜師夔駿馬二俾招未附者許以便宜從事明年加左監門衛大將軍劇賊張勝以萬人逼城師夔度衆寡不敵乃僞與之和日致饋給勝信之師夔乘其不備使人刺勝殺之以其首徇曰汝輩皆良民脇從至此今元惡已誅可棄兵歸復其所賊衆大驚皆散去別賊焦望天尹智穆率兵數千來寇師夔以兵臨之設伏歸路使人反間之智穆果疑望天先引去智穆勢孤亦還遇伏而敗遂執斬之是後賊衆不敢入境以勞遷靜江軍節度留後累遷武平軍節度使改東京路轉運使徙陝西東路轉運使致仕封任國公卒年八十五

阿徒罕

按金史本傳阿徒罕溫迪罕部人年十七從撒改斡帶等討平諸部皆身先力戰高麗築九城於曷懶甸斡塞禦之阿徒罕爲前鋒高麗有屯於海島者阿徒罕率衆三十人夜渡焚其營柵戰艦大破之遂下馳吉城旣而八城皆下功最遼兵自寧江州東門出阿徒罕逆擊盡殪之以功授謀克從攻黃龍府力戰身被數十創竟登其城後與烏論石準援照散城阿徒罕請乘不備急擊之遂夜過益褪水詣朝大敗之斡魯上其功賜幣與馬天輔四年五月疾病賜良馬一匹詔曰汝安則乘之年六十五卒上悼惜之遣使弔祭以馬爲贈阿徒罕爲人孝悌好施惠健捷善弋獵至角觝擊鞠咸精其能

郭企忠

按金史本傳企忠字元弼唐汾陽王子儀之後郭氏自子儀至承勳皆節鎮北方唐季承勳入於遼子孫繼爲天德軍節度使至昌金降爲副使企忠幼孤事母孝謹年十三居母喪哀毀如成人服除襲父官加左散騎常侍天輔中大軍至雲中遣耶律坦招撫諸部企忠來降軍帥命同勾當天德軍

節度使事徙所部居於韓州及見太祖問知其家世禮遇優厚以白鷹賜之天會三年伐宋領西南諸部番漢軍兵爲猛安從破鴈門屯兵加桂州管內觀察留後鎮代州明年賊楊麻胡等聚衆數千於五臺企忠與同知州事迪里討平之遷知汾州事是時汾州初下居民多爲軍士掠去城邑蕭然企忠詣帥府力請願聽其親舊贖還帥府從之未幾完實如故石州賊閻先生衆數萬至城下僚屬慮有內變請爲備企忠曰吾於汾人有德保無他乃率吏民城守會援至合擊破之六年改靜江軍節度留後遷天德軍節度使汴京步軍都指揮使累遷金吾衛上將軍秩滿權沁州刺史到官歲餘卒年六十八

婁室

按金史本傳婁室字幹里衍完顏部人年二十一代父白答爲七水諸部長太祖克寧江州使婁室招諭係遼籍女直遂降移燉益海路太彎照撒等敗遼兵於婆刺趕山復敗遼兵擒兩將軍旣而益改捺末懶兩路皆降進兵咸州克之諸部相繼來降獲遼北女直係籍之戶遼都統耶律訛里朶以二十餘萬衆來戍邊太祖趨達魯古城次寧江州西召婁室婁室見上於軍中上見婁室馬多疲乏

以三百給之使隸左翼宗翰軍與銀朮可縱兵衝其中堅凡九陷陣皆力戰而出復與銀朮可成邊及九百奚營等部來降則與銀朮可攻黃龍府上使完顏渾黜婆盧火石古乃以兵四千助之敗遼兵萬餘於白馬濼宗雄等下金山縣使婁室分兵二千招沿山逃散之人耶律捏里軍蹙蔡山幹魯古婁室等破之遂取顯州太祖取黃龍府婁室請曰黃龍一都會且僻遠苟有變則鄰郡相扇而起請以所部屯守太祖然之仍合諸路謀克命婁室爲萬戶守黃龍府進都統從朮取中京與希尹等襲走迪六和尚雅里斯等敗奚王霞末降奚部西節度訛里刺遼主自鴛鴦濼西走婁室等追至白水濼獲其內庫寶物婁室遂與闍母攻破西京復與闍母至天德雲內窺邊東勝其官吏皆降獲阿疎夏人救遼兵次天德婁室使突撚補擲以騎二百爲候兵夏人敗之幾盡阿土罕復以二百騎往遇伏兵獨阿土罕脫歸時久雨諸將欲且休息婁室曰彼再破吾騎兵我若不復往彼將以我怯卽來攻我矣乃選千騎與習失拔離速往幹魯壯其言從之婁室遲明出陵野嶺留拔離速以兵二百據險守之獲生口問之其帥李良輔也將至野登高望之夏人恃衆而不整方濟水爲陣乃使人報幹魯婁室分軍爲二迭出迭入進退轉戰三十里過宜水幹魯軍亦至合擊敗之遼都統大石犯奉

聖州壁龍門東二十五里婁室照里馬和尙等以兵取之生獲大石其衆遂降遼關里刺守奉聖州棄城遯去後與宗望追遼帝婁室蒲察以二十騎候敵敗其軍三千人於三山有千人將趨奉聖州蒲察復敗之擒其主帥而還夏人屯兵於可敦館宗翰遣婁室戍朔州築城於霸德山西南二十里遂破朔州西山兵二萬擒其帥趙公直其後復襲遼帝於余都谷獲之賜鐵券惟死罪乃答之餘罪不問銀朮可圍太原宋統制劉臻救太原率衆十萬出壽陽婁室擊破之繼敗宋兵數千於榆次宋張灝軍出汾州拔離速擊走之灝復營文水婁室與突葛速拔離速與戰灝大敗宗翰定太原婁室取汾石二州及其屬縣溫泉方山離石蒲察降壽陽取平定軍及樂平復招降遼州及榆社遼山和順諸縣宗翰趨汴州使婁室等自平陽道先趨河南曰若至澤州與賽里婆盧火習失遇當與俱進習失之前軍三謀克敗宋兵三千於襄垣遇伏兵二千又敗之撒刺答破天井關復破步兵於孔子廟南遂降河陽婁室軍至旣渡河遂薄西京城中兵來拒戰習失逆擊敗之西京降婁室取偃師永安軍鞏縣降撒刺答敗宋兵於汜水於是滎陽滎澤鄭州中牟相次皆降宗翰已與宗望會軍於汴使婁室率師趨陝津攻河東郡縣之未下者阿离土罕敗敵於河上撒按敗敵於陝城下鶻沙虎降

號州守陴卒三百人遂克陝府習古迺桑袞破陝之散卒於平陸西北活女別破敵於平陸婁室破蒲解之軍二萬盡覆之安邑解州皆降遂克河中府降絳慈隰石等州宗翰往洛陽使婁室取陝西敗宋將范致虛軍下同華二州克京兆府獲宋制置使傅亮遂克鳳翔阿鄰等破宋大兵於河中幹魯破宋劉光烈軍於馮翊訛特刺桑袞敗敵於渭水遂取下邽宗翰會宗輔伐康王命婁室蒲察專事陝西以婆盧火繩果監戰繩果等遇敵於蒲城及同州皆破之婁室蒲察克丹州破臨真進克延安府遂降綏德軍及靜邊懷遠等城寨十六復破青澗城宋安撫使折可求以麟府豐三州及堡寨九降於婁室晉寧所部九寨皆降而晉寧軍久不下婁室欲去之賽里不可曰此與夏鄰且生他變城中無井日取河水以爲飲乃決渠於東泄其水城中遂困李位石乙啟郭門降諸將率兵入城守將徐徽言據子城戰三日衆潰徽言出奔獲之使之拜不聽臨之以兵不爲動繫之軍中使先降者諭之使降徽言大罵與統制孫昂皆不屈乃并殺之遂降定安堡渭平寨及鄜坊二州於是婁室婆盧火守延安折可求屯綏德蒲察還守蒲州延安鄜坊州皆殘破人民存者無幾婁室置官府輯安之別將幹論降建昌軍京兆府叛婁室復討平之遂與阿盧補謀里也至三原訛哥金阿骨欲擊淳

化兵敗之婁室攻乾州已築甬道列礮具而州降遂進兵克邠州軍於京兆陝西城邑已降定者輒復叛於是睿宗以右副元帥總陝西征伐時婁室已有疾睿宗與張浚戰於富平宗弼左翼軍已却婁室以右翼力戰軍勢復振張浚軍遂敗睿宗曰力疾鏖戰以徇王事遂破巨敵雖古名將何以加也以所用犀玉金銀器及甲冑并馬七匹與之天會八年薨十三年贈泰寧軍節度使兼侍中加太子太師皇統元年贈開府儀同三司追封莘王以正隆例改贈金源郡王配享太宗廟庭諡莊義子活女謀衍石古乃

完顏希尹

按金史本傳希尹本名谷神歡都之子也自太祖舉兵常在行陣或從太祖或從撒改或與諸將征伐比有功金人初無文字國勢日強與鄰國交好乃用契丹字太祖命希尹撰本國字備制度希尹乃依倣漢人楷字因契丹字制度合本國語製女直字天輔三年八月字書成太祖大悅命頒行之賜希尹馬一匹衣一襲其後熙宗亦製女直字與希尹所製字俱行用希尹所撰謂之女直大字熙宗所撰謂之小字遼人迪六和尚雅里斯棄中京走希尹與迪古乃婁室余睹襲之迪六等聞希尹

兵復走遂降其旁近人民而還奚人落虎來降希尹使落虎招其父西節度使訛里刺訛里刺以本部降宗翰駐軍北安使希尹經略近地獲遼護衛耶律習泥烈知遼主獵於鴛鴦濼宗翰遂請進兵宗翰將會都統杲於奚王嶺遼兵屯古北口使婆盧火將兵二百擊之渾黜亦將二百人爲後援渾黜聞遼兵衆請益兵宗翰欲親往希尹婁室曰此小寇請以千兵爲公破之渾黜至古北口遇遼遊兵逐之入谷中遼步騎萬餘追戰死者數人渾黜據關口希尹等至大破遼兵斬馘甚衆盡獲甲冑輜重復敗其伏兵殺千餘人獲馬百餘匹遂與宗翰至奚王嶺期會於羊城濼宗翰襲遼帝於五院司希尹爲前驅所將纔八騎與遼主戰一日三敗之明日希尹得降人麻哲言遼主在漠委輜重將奔西京幾及遼主於白水濼南遼主以輕騎遯去盡獲其內庫寶物遂至西京西京降使蒲察守之希尹至乙室部不及遼主而還及宗翰入朝希尹權西南西北兩路都統是時夏人已受盟遼主已獲耶律大石自立而夏國與婁室書責諸帥棄盟軍入其境多掠取者希尹上其書且奏曰聞夏使人約大石取山西諸郡以臣觀之夏盟不可信也上曰夏事酌宜行之軍入其境不知信與否也大石合謀不可不察其嚴備之及大舉伐宋希尹爲元帥右監軍再伐宋執二主以歸師還賜希尹鐵

券除當赦不原之罪餘釋不問宗翰伐康王希尹追之於揚州康王遜去後與宗翰俱朝京師請立熙宗爲儲嗣太宗遂以熙宗爲諱班勃極烈熙宗卽位希尹爲尙書左丞相兼侍中加開府儀同三司希尹爲相有大政皆身先執咎天眷元年乞致仕不許罷爲興中尹二年復爲左丞相兼侍中俄封陳王與宗幹共誅宗磐宗雋三年賜希尹詔曰師臣密奏姦狀已萌心在無君言宣不道逮燕居而竊議謂神器以何歸稔於聽聞遂致章敗遂賜死并殺右丞蕭慶并希尹子同修國史把答符寶郎漫帶是時熙宗未有皇子故嫉希尹者以此言譖之皇統三年上知希尹實無他心而死非其罪贈希尹儀同三司邢國公改葬之蕭慶銀青光祿大夫天德三年追封豫王正隆二年例降金源郡王大定十五年諡貞憲孫守道守貞守能守道自有傳

阿勒根沒都魯

按金史本傳沒都魯上京納鄰河人也後徙咸平路梅黑河雄偉美鬚髯勇毅善射國初伐遼沒都魯在軍中領謀克猛安每遇敵往來馳突人莫敢當故所戰皆克皇統元年計功擢宣威將軍明年授同知通遠軍節度使改移刺都弘詳穩授世襲本路監打渾河謀克爲滑州刺史改肇州防禦使

蒲與路節度使遷驃騎上將軍是歲以年老致仕卒累官金吾衛上將軍年七十三

烏延蒲盧渾

按金史本傳蒲盧渾曷懶路烏古敵昏山人父孛古剌龍虎衛上將軍蒲盧渾膂力絕人能挽彊射二百七十步與兄鶻沙虎俱以勇健隸闕母軍居帳下攻黃龍府力戰有功闕母敗於兔耳山張覺復整兵來諸將皆不敢戰蒲盧渾登山望之乃給諸將曰敵軍少急擊可破也若入城不可復制遂合戰破之郭藥師蔡靖以燕京降蒲盧渾率九十騎先伺察城中居民去就遂將漢兵千隸完顏蒙遁攻真定進攻贊皇取之獲人畜甲仗萬餘汴城破日已暮宋人猶力戰槍刺中蒲盧渾手戰益力遂敗宋軍賜金五十兩睿宗爲右輔元帥已定關陝議取劍外諸州遂拔和尚原元帥府承制以蒲盧渾爲河北西路兵馬都總管及宋主在揚州蒲盧渾與蒙遁將萬騎襲之宋主已渡江破其餘兵後與斜卯阿里俱從宗弼自淮西渡江取江寧宗弼入杭州宋主走明州再走温州由海道追三百餘里驢明州而歸語在阿里傳天眷二年授鎮國上將軍除安國軍以疾去官皇統六年授世襲謀克起爲延安尹賜尙衣一襲尋致仕海陵遷中都起爲歸德尹就其家授之賜銀牌襲衣玉吐鶻馳

驛之官蒲盧渾留數十日已違程復聽致仕召赴京師至薊州見海陵於獵所明日從獵獲一狐海陵曰卿年老尙能馳逐擊獸健捷如此賜以御服封國公除太子少師進太子太保改眞定尹入判大宗正事頃之伐宋以本官行右領軍副都督事師次西采石海陵欲渡江蒲盧渾曰宋軍船高大我船庫小恐不可遽渡海陵怒曰汝昔從梁王追趙構於海島皆大舟耶今乃沮吾兵事設不能遽渡江不過有少損耳爾年已七十縱自愛豈有不死理耶明日當與奔睹先濟旣而復止之乃遣別將先渡江舟小不可戰遂失利兩猛安及兵士二百餘人皆陷沒海陵遇害軍還大定二年至中都上謁除東京留守世宗召問年幾何對曰臣今年七十三矣上曰卿宿將久練兵事年雖老精神不衰因命到官每旬月一視事賜衣一襲進階開府儀同三司仍封國公是歲卒十八年孫扎虎遷廣威將軍襲烏古敵昏山世襲猛安并親管謀克

黃摑敵古本

按金史本傳敵古本世居星顯水從破寧江取咸州平東京路及諸山寨柵皆有功從麻吉破遼將和尚節使兵七千於上京復破那野軍二萬再從麻吉遇敵於阿鄰甸麻吉被創不能戰敵古本率

兵擊敗之勦殺殆盡從攻回鶻城破其兵九萬敗木匠直撒兵於山後俘獲甚衆敗昭古牙之兵三千獲其家屬而還攻平州張覺吾春被圍於西山敵古本引兵救之解其圍并獲糧五千斛招降戶口甚衆從平興中撫安其民人天會間大軍伐宋敵古本從取濬開德大名及取濟南高唐棣密等州皇統間以功襲謀克移屯於壽光縣界爲千戶六年授世襲千戶棣州防禦使卒

海里

按金史本傳海里婁室族子體貌豐偉善用稍婁室爲黃龍府萬戶海里從徙於孰吉訛母從婁室追及遼主於朔州阿敦山遼主從數十騎逸去婁室遣海里及朮得往見遼主諭之使降遼主已窮蹙待於阿敦山之東婁室因獲之賞海里金五十兩銀五百兩幣帛二百匹絲三百兩睿宗經略陝西海里戰却吳玠軍於涇邠之南尋遣修棧道宋人恐棧道成以兵來拒破其兵賞銀百五十兩奴婢十人天眷元年擢宿直將軍與定宗磐宗僞之亂再遷廣威將軍除都水使者改西北路招討都監歷復州灤州刺史耶盧碗羣牧使迭刺部族節度使同知大興尹兼中都路兵馬都總管改武寧軍節度使廣寧尹卒年六十二

蕭恭

按金史本傳恭字敬之乃烈奚王之後也父翊天輔間歸朝從攻興中遂以爲興中尹師還以恭爲質子宗望伐宋翊當領建興成川懿五州兵爲萬戶軍帥以恭材勇使代其父行時年二十三至中山宋兵出戰恭先以所部擊敗之經山東及渡淮襲康王皆在軍中師還帥府承制授德州防禦使奚人之屯濱棣間者皆隸焉改棣州防禦使皇統間改同知橫海軍節度使丁父憂起復爲太原少尹用廉遷同知中京留守事累遷兵部侍郎授世襲謀克坐問禁中起居狀決杖奪一官貞元二年爲同知大興尹歲餘遷兵部尙書爲宋國生日使以母憂去官起復爲侍衛親軍馬步軍都指揮使四年遷光祿大夫復爲兵部尙書是歲經畫夏國邊界還過臨潼失所佩金牌至太原憂恚成疾時已具其事驛聞於朝海陵復命給之仍遣諭恭曰汝失信牌亦猶不謹朕方俟汝欲有委使乃稱疾耶必以去日身佩信牌歸則無以爲辭欲朕先知耳使至恭已疾篤稽顙受命俄頃而卒海陵方遣使與其子護衛九哥馳視乃戒府官使善護之至保州已聞訃矣海陵深悼惜之命九哥護喪以還所過州府設奠喪至都命百官致祭親臨奠賻贈甚厚并賜廐馬一謂九哥曰爾父銜命卒於道途

甚可悼惜朕乘此馬十年今賜汝父可常控至柩前既葬汝則乘之

王伯龍

按金史本傳伯龍瀋州雙城人也遼末聚黨爲盜天輔二年率衆二萬及其輜重來降授世襲猛安知銀州兼知雙州三年太祖攻臨潢伯龍與韓慶和以兵護糧餉輓夫千五百人皆授甲慶和已將兵行前伯龍從糧居後遇遼兵五千餘邀於路伯龍率輓夫擊敗之獲馬五十匹四年從攻下中京并克境內諸山寨爲靜江軍節度留後五年眞授節度使從宗望討張覺於平州伯龍先登馳擊手殺數十百人遷右金吾衛將軍白河之戰伯龍當其左軍磨兵疾馳蹂之宋軍亂我師乘勝奮擊敗之宗望伐宋伯龍爲先鋒次保州遇敵五萬破之招降新樂軍民十餘萬大軍圍汴宋太尉何杲以軍數萬出酸棗門伯龍以本部遮擊多所斬獲及破汴伯龍以治攻具有功進破孔彥舟鄺瓊衆三萬於洛州是年同知保州兵馬安撫司事將兵數千攻北平拔之復取保州河間睿宗經略山東伯龍從攻青州未下城中夜出兵襲伯龍營伯龍不及甲獨被衣挺刃拒營門敵不得入因奮擊殺數十人已而軍士皆甲出殺傷宋兵不可勝計并獲其一將斬之及下青州第功伯龍第一六年還攻

莫州降之加太子少保莫州安撫使破李固寨衆十餘萬於濮州濮城守城中鎔鐵揮我軍攻之不能剋伯龍被重甲首冠大釜挺槍先登殺守陴者二十餘人大軍相繼而上遂剋之進攻徐州伯龍復先登充徐宿邳三路軍馬都統敗高托山之衆十五餘萬於清河進擊韓世忠於邳州走之與大軍會於宿遷追世忠至揚州還攻泗州泗州守將以城降屯軍甌陽破陳宏賊衆四十餘萬破黃戩於單州進攻歸德軍帥遣伯龍立攻具伯龍從二十餘騎行視地形城中忽出兵千餘欲生得伯龍伯龍縱騎馳之敵兵亂墮墮而死者幾二百人破王善之衆於巢縣取廬州和州伯龍之功多軍渡采石擊敗岳飛劉立路尙等兵獲芻糧數百萬計還過真揚道遇酈瓊韓世忠軍復戰敗之復爲莫州安撫改知澤州太行羣賊往往嘯聚伯龍皆平之天眷元年爲燕京馬軍都指揮使從元帥府復收河南權武定軍節度使兼本路都統宋兵據許州伯龍擊走之招復其人民是年秋泰安卒徒張貴驅脅良民據險作亂伯龍討平之皇統元年以本部從宗弼南伐攻破濠州而還三年爲武定軍節度使改延安尹寧昌軍節度使天德三年改河中尹徙益都尹封廣平郡王卒年六十五正隆間例贈特進定國公